

Isnin, 11 Mei 2020 | 11:13am



**TIMBALAN Menteri Perdagangan Dalam Negeri dan Hal Ehwal Pengguna, Datuk Rosol Wahid.**  
**NSTP/Aizuddin Saad**

## **Pasukan khas pantau peniaga**

Oleh: Baharom Bakar  
bhnews@bh.com.my

**KUALA TERENGGANU:** Kerajaan akan menubuhkan pasukan khas bagi memantau pelbagai kesalahan dilakukan peniaga, terutamanya kes keracunan makanan.

Timbalan Menteri Perdagangan Dalam Negeri dan Hal Ehwal Pengguna, Datuk Rosol Wahid menjelaskan, pasukan khas itu terdiri daripada pelbagai agensi penguatkuasa dan akan melakukan rondaan bersama.

Katanya, cadangan penubuhan pasukan khas itu sedang diperhalusi dan akan dimuktamadkan dalam tempoh terdekat.

"Kementerian Perdagangan Dalam Negeri Dan Hal Ehwal Pengguna (KPDNHEP) akan memberi kerjasama untuk merealisasikan penubuhan pasukan khas itu.

"Menerusi gabungan dan kerjasama itu, tindakan menyeluruh dapat dilakukan dalam menangani pelbagai kes," katanya ketika ditemui selepas menziarahi bekas jurufoto, Azlan Baharum, 36, yang menghidap penyakit gout sejak 19 tahun lalu di rumah pangsa Ladang Gemilang, di sini, hari ini.

Yang turut hadir adalah Timbalan Pengarah Penguatkuasaan (Pengurusan) KPDNHEP, Azman Adam dan Timbalan Presiden Kelab Wartawan Terengganu (KAWAT), Suhaimi Ahmad.

Rosol yang juga Ahli Parlimen Hulu Terengganu berkata, inisiatif penubuhan pasukan khas itu lebih memudahkan penguatkuasaan dilakukan sekali gus.

"Misalnya, KPDNHEP tidak boleh mengambil tindakan jika ada kes keracunan makanan kerana kesalahan itu hanya boleh dilakukan Kementerian Kesihatan (KKM).

"Kerja pemantauan lebih mudah dan menjimatkan kos jika pasukan khas itu ditubuhkan serta bergerak secara bersama ketika mengadakan operasi," katanya.

<https://www.bharian.com.my/berita/wilayah/2020/05/687518/pasukan-khas-pantau-peniaga>

